

Enwi pennaeth yr ysgol Gymraeg newydd



Mae Pennaeth Ysgol y Preseli yng Nghrymmych, Michael Davies, wedi'i enwi'n Bennaeth cyntaf yr ysgol cyfrwng Cymraeg ar gyfer plant tair i 16 oed sy'n cael ei hadeiladu yn Hwlfordd ar hyn o bryd.

Bydd Mr Davies yn aros yn ei swydd bresennol ac yn Bennaeth Gweithredol ar y ddwy ysgol.

Daw'r penodiad yn sgil cytundeb rhwng corff llywodraethu dros dro yr ysgol newydd a llywodraethwyr Ysgol y Preseli.

Mewn llythyr at rieni a gwarcheidwaid disgyblion y pedair ysgol sy'n bwydo'r ysgol yn Hwlfordd, ysgrifennodd cadeirydd y corff llywodraethu dros dro, Tegryn Jones:

“Cytunwyd i benodi Mr Michael Davies, Pennaeth presennol Ysgol y Preseli, yn Bennaeth Gweithredol ar y ddwy ysgol am y blynyddoedd nesaf, er mwyn cefnogi'r broses o sefydlu a datblygu'r ysgol newydd.

“Mae'r corff llywodraethu dros dro yn hynod falch o gael penodi Mr Davies, sydd â phrofiad helaeth o arwain ysgol cyfrwng Cymraeg lwyddiannus.

“Rydym yn hyderus fod ganddo'r weledigaeth a'r sgiliau arwain i sicrhau y bydd disgyblion yr ysgol yn cael addysg ragorol mewn adeilad cwbl gyfoes.”

Mewn llythyr at rieni disgyblion Ysgol y Preseli, dywedodd cadeirydd y llywodraethwyr, Des Davies:

“Bydd hyn yn golygu ad-drefnu cyfrifoldebau yn nhîm yr uwch-arweinwyr a phenodi athro ychwanegol i sicrhau bod yr ysgol yn dal i gyrraedd ei safonau uchel.

“Bydd y trefniadau uchod yn cael eu hadolygu bob mis gan y ddau gorff llywodraethu a'r Awdurdod Addysg Lleol.”

Ychwanegodd Mr Davies mai'r hyn y cytunwyd arno oedd creu partneriaeth ffurfiol rhwng y ddwy ysgol er mwyn sicrhau bod llwyddiant addysg cyfrwng Cymraeg yn Sir Benfro yn parhau.

Dywedodd Mr Michael Davies, "Mae'n ffrainc cael gwahoddiad i fod yn Bennaeth Gweithredol ar Ysgol y Preseli a'r ysgol cyfrwng Cymraeg 3-16 oed newydd yn Hwlfordd.

"Rwy'n edrych ymlaen at yr her o sefydlu a datblygu'r ysgol newydd, gan sicrhau ar yr un pryd fod safonau uchel presennol Ysgol y Preseli yn cael eu cynnal.

"Bydd adeiladu partneriaeth effeithiol rhwng y ddwy ysgol yn allweddol i lwyddiant addysg cyfrwng Cymraeg yn Sir Benfro yn y dyfodol."

- Yn y cyfamser, trefnir cyfres o nosweithiau agored yn ystod pythefnos cyntaf mis Rhagfyr, lle bydd croeso i ddarpar ddisgyblion yr ysgol newydd a'u rhieni. Cyhoeddir y manylion cyn bo hir.

Er mwyn ystyried rhieni nad ydynt hyd yn hyn wedi penderfynu ar eu dewis o ran lle mewn ysgol uwchradd ar gyfer mis Medi, 2018, mae'r dyddiad cau ar gyfer derbyn ceisiadau am bob lle mewn ysgol uwchradd wedi ei fwrw ymlaen. Bydd hyn yn rhoi rhagor o amser i rieni fynegi eu dewis.

Felly, anogir rhieni i gyflwyno eu ceisiadau erbyn 5 Ionawr drwy wefan y Cyngor Sir.

Pennawd

Michael Davies.